

連雲書屋存稿

二冊之一

嘉慶乙亥新鑄

連雲書屋存稿

碧苔苑藏板

雲書屋存稿



琴齋先生觀察漢黃

清履

幸爲屬下吏。已載餘矣。每晉

謁間。於諮諏政事外。相與縱設詩古文詞。並示以連雲
書屋詩稿。命爲校勘之。吟賞餘。覺大篇決流。短章斂芒。
縛而不釀。縮而不僭。自非精法律。富吟哦者。安能臻此。
粹詣。蓋先生平昔愛誦大蘇詩集。及典試蜀中。綰符海
外。又親歷大蘇之枌榆。與其它跡。邇來勾稽偶暇。每遊
定惠之院。臨臯之亭。赤壁西山。寒溪諸勝。輒流連咏嘆。
俯仰遺址。而慨慕其爲人。讀自號懷坡山人一篇。知先
生瓣香所祝。固自有在。獨是文忠公在黃州。則以團練

副使。屏於寬間寂寞。及在瓊州。亦因屢見左遷。而以別
駕安置昌化。故其詩之見諸營東坡築雪堂。與夫負瓢
行歌於僮耳間者。往往鬱勃淋漓。激昂慷慨。而先生當
重熙累洽之時。得以自展其功名勲業。凡所抽祕騁
妍。自無不可以見性情之閒適。辭氣之安恬。殆其遭際
之隆。有與文忠迥異者。昔文忠公嘗謂出處老少。麤似
樂天。而其爲詩。則一空依傍。獨自成家。先生之寄懷於
坡老者。毋乃類是。而況集中平黎諸作。歷叙夫勦撫。兼
施公勤。匪懈。馳摯之氣。溢於言表。令後之守瓊者。可以

自序

詩以道性情。無性情則詩可不作。作亦不必存。然則人之有詩。其必有不能已者乎。余少年未嘗學詩。通籍後。奉職京華。與同年諸君子。公餘之暇。砥礪德業。時相贈答。始學爲韻語。然多未成片段。隨手置之而不存。嗣銜命典試蜀中。出守瓊南。見其山川之奇秀。風土之僻異。觸類興懷。緣情賦事。頗有動於中。而不能自已者。於是直抒胃臆。吟詠成帙。茲遊楚四載。於南北二省。流覽大。半。山。則。歷。衡。岳。參。廬。水。則。觀。湘。潯。江。漢。登。臨。之。餘。亦。聞。

有紀述以發心性之蘊閱歷之奇合前後十數年所吟
嘯將及千餘篇同人之愛我者殷殷勸付諸梓予心歉
然而不敢藏拙乃諄囑好友竹西錢君爲之刪其繁冗
而不經意者僅存若干首名之曰連雲書屋存稿連雲
者從故里海島名也詞之工拙不敢計聊以志平生嗜
識

痴之癖性云爾嘉慶二十年秋八月琴齋居士和生自

連雲書屋存稿卷一

益州 焦和生 琴齋

聞秋聲有感

時奉 派詳校 文源閣全
書住居 圓明園之一畝園

砧杵聲高動碧空。客懷終夜伴鳴蟲。一天淅瀝清秋雨。
半枕蕭騷落葉風。夢裏家鄉何日到。篋中書信隔年通。
村醪無力澆愁去。報說霜前到塞鴻。

村舍

結廬背郭自堅牢。幾處疎籬鎖寂寥。野圃日斜花影亂。
秋林風定鳥聲嬌。一峯當戶新螺黛。萬柳圍隄舊舞腰。

昨夜沙頭知雨過溪流初漲水平橋

次浩持道中卽景韻

故人歸去重行行一路風光愜旅情
四野綠雲秋稼好半林黃葉晚涼生
鵬盤孤嶼翎方健馬惜障泥雨乍晴
可憶平湖烟靄裏清吟人對數鷗輕

將發一畝園次伊雲林韻

西園兩月愛盤旋消盡塵寰溽暑天
此去青山和夢老幾回皓魄向人圓
醉來豪興思揮筆雨後新寒欲試棉
學步羣公愧枵腹空教祖述著先鞭

時又有校三分書之命

校書事竣歸都城

坐對湖山夏復秋一朝分別轉勾留
琢成佳句盈囊富添得歸鞍滿眼愁
小飲每邀林上月閒行常狎水中鷗
風光何日重來覓處處筇枝記舊遊

道中回望一畝園

驅車重去踏紅塵回首幽居悵望頻
天外秋山如送客雲間流水忽迷津
疎林不改來時路黃葉全非往日春
莫對西風空佇立斜陽滿地正愁人

過村舍書所見

籬根詰屈逐岩斜茅屋寥寥三兩家過雨新禾時偃仰
經秋老木剩杈桯烟藏犢背兒橫笛桑隱雛鬟女績麻
應識豐年耕織樂野人無意學栽花

飛飛白鷺下寒塘秋草淒迷護短墻山徑雲深松蔭碧
柴門風冷菜花香老農築圃初勤力少婦村居絕艷粧
會得田家好風味紅塵應笑道途忙

歸來

歸來羸馬脫征鞍對客開懷傍藥闌却憶前宵望湖月
正吟好句伴秋寒魚鰕味美臨波買菱藕香清帶露看

今日齏鹽慙舊味
室人猶自勸加餐

和閻玉維同年客夜感懷元韻

幾處砧聲夜未休
可堪孤客尙淹留
笛橫明月雁橫塞
葉滿空堦風滿樓
小阮文章工寫恨
玉維乃浩持之姪
子山詞賦慣悲秋
何時却理歸鞍去
消盡天涯萬斛愁

與荔園浩持飲全秋濤話雨山房卽席得秋字

主人高雅古名流
日掃幽軒待客遊
藤蔓陰疎能受月
竹林風細最宜秋
江南嘉饌登鱸膾
研北新詩伴酒籌
聯句羞予無健筆
羣公應笑醉鄉侯

秋夜懺園小集與石癯荔園浩持各賦一景分得
心遠堂後土山五古一首限山字

非山忽突兀積土成孱顏綠野當其南掩映苔蘚斑怪
石列左右巉巖難躋攀上有百年樹陰森籠翠鬟倦飛
高鳥集繞徑白雲環地偏心逾遠幽境超塵寰我來登
絕頂城市一覽間主客拚一醉良夜幾人閒刻燭索新
詠自愧得句慳山色晚益佳徘徊不忍還何必隨赤松
長此訂余頑

過一畝園書懷

夙志愛岩壑願向深山居六旬塵外遊樂意關禽魚自
別烟霞境鬱鬱歸吾廬遂令清夜夢迢遞追樵漁茲晨
喜重徃良友同巾車出城風景別夾路槐陰踈夕陽映
山色空翠描難如行行至湖上人靜柴門虛落葉沒履
跡宿莽生前除俯仰增感慨流連念厥初伊昔當夏五
薰風來紆徐欣登天祿閣盥手讐奇書朝朝事染翰同
列皆簪裾退食出左掖歸路緣清渠嘒嘒暮蟬聲最宜
新雨餘湖邊或散步待月看芙蕖境靜物無擾心遠情
自舒同儕約觴詠滿飲甕浮蛆狂歌與醉墨能使幽懷

遠望書屋有秋
四
攄擬將塵土髣常傍仙人間一朝酒徒散佳景留郊墟
憶舊但極目渺渺空愁予因念榮枯意蝶夢同蘧蘧古
人貴行樂名論真璫璣奈何俗事撓回首徒歛歛幾時
謀二頃來此學荷鋤日偕素心友酌酒剪野蔬茲事恐
未遂茲願終難祛惄然理歸轡欲去還躊躇蕭蕭古原
上秋風吹白驢

遊萬壽寺觀假山

暇日訪名利詰屈穿深山步隨踈磬遠心共飛雲閒峯
迴寺門敞清寂殊人寰廣庭逾幽邃佛屋青苔環浮圖

怖鴿靜老木秋風刪最後聳壘嶂瘦石堆孱顏烟嵐望
突兀洞壑呈扁爛或如蛟龍姿羣攫凌銀灣或若虎豹
勢蹲踞當雄關咫尺迷遠近悵望愁登攀得非靈鷲峰
飛來雲海間攝衣循石磴振策摩烟鬟數折到絕頂空
濶開冥頑劃然作長嘯逸韻驚孤鷗小憩山上亭坐對
楓林殷老僧畧相識烹茶汲幽潺相與話靜果妙義頗
能嫺因知佛國樂殊勝歧途艱前時履清境嬾駕塵中
輟重來增惓戀日暮猶忘還梵聲如留客道心依葢蘭
焉能掇俗障禪室安伏跼脫然悟前因洒爾忘憂患拈

花一微笑喜我緣非慳

胡果泉過我小飲以詩見贈次韻奉答

天涯知己別經秋
此夕開尊幸少留
人世幾回花在眼
春光一去雪盈頭
庾家清興三更月
陶令新詩百尺樓
爲問忽忽車馬客
賞音難得是名流

九日同荔園浩持赴 圓明園歸至懺園登土山

分賦得七古一首限登字

霜林慘淡烟光凝
涼飈颯颯新寒增
重陽有酒不得飲
又驅羸馬循秋塍
遠山如畫翠撲面
幾人把臂欣同登